

vene a galia, da esso zeneral, a visitarlo, et conseiò li fosse mandato a dir aspre parole, poi non si voleva render. *Item*, sier Hironimo Pixani, provedador di l'armada, era andato a trovar locho da far legnami, a presso la marina. *Item*, el capetanio questa matina mandò X in 12 cavalieri, con 500 boni fanti, tra schiopetieri e ballestrieri e lanzaruoli, a veder il sito dil castello; e il zeneral li à mandato molti stratioti in compagnia. *Item*, esso zeneral à retenuo tutti li provisionati di l'armada, e quelli sono con Gorlim; con questo, non li cora soldo, ma li sia fato le spexe da li soracomiti. *Item*, el capetanio yspero à ditto, che in zorni X si consumerà a Modon barilli 3000 di polvere, trazando di e note, *videlicet* 600 botte al di; et che su la sua armada non hanno, oltra il fornimento di essa e di superchio, barilli 400; *unde* el zeneral fè far la zercha di la polvere è su le galie nostre e nave, e à trovato esserne barilli 2000, e à scritto a Corfù ne mandi; et al Zante ne sono barilli 200. *Item*, l'armata ysperana tolse bote 200 di vin, di raxon di sier Piero Contarini e sier Michiel Foscarei, di uno grippo, bote 29, *unde* manderà in Candia a torne *solum* 300, computà le 25 di muschatello, et 60 miera di formazi. *Item*, vol biscoto, e a Corfù n'è *solum* miara 60.

*Dil ditto zeneral, di 5, ivi.* Come in quella matina era zonto li el capetanio di Franza, con la galia di sier Antonio da Canal; *etiam* la barza zenoesse vene, *unde* mandò sier Hironimo Contarini, provedador di l'armada, e sier Marco Orio, capetanio di le nave, a visitarlo, e dirli di l'impresa si ha a tuor di Modom. Et esso capetanio francese ringratiò. Poi disse, voria la resolution di la licentia di la nave soa, qual convien compir a di 20 di questo a Zenoa, e à molti homeni boni suso, da numero 300 provisionati, che, a uno per l'altro, si li dà ducati 3 al mese; e farà la zercha e mostra per la pope di la galia dil zeneral. Li risposeno, non haver hordine di la Signoria nostra, ma soa magnificencia era in libertà; et lo persuase a star, perchè l'impresa di Modom saria breve. Or disse manderia el patrom di la nave dal zeneral, dicendo el capetanio: El re di Spagna, con questa sua armada de 70 velle, se persuade far lo imperador di Constantinopoli; sapiate che el mio re vuol esser imperador di Constantinopoli, e uno altro anno el manderà altratante velle, quante sono queste di Spagna, per far questo effeto. E il provedador nostro rispose, la potentia di la christianissima majestà era grande. *Item*, esser venuto da esso zeneral domino Pantaleo Sachano, zenthilomo misinese, cugnado di domino Anzolo Farion, e li disse

che l'armata costava ai reali di Spagna ducati 600 milia a l'anno, e perhò il capetanio voria prender qualche terra, specificando Negroponte e Metelin, e far poi contracambio con qualche terra di la Signoria. Rispose el zeneral, niun l'impazeria a questo. E lui disse, bisognava l'ajuto di la nostra armada. E a questo il zeneral nulla rispose. E ditto domino Pantaleo mostrò dir questo da lui. Or il zeneral voria saper sopra ziò l'opinion nostra. Aricorda se li manda danari; e Alvise Zio, à 'uto fluxo, sta meglio.

*Dil ditto zeneral, date ivi, a di 6, tenute fin 7.* Chome era ritornà il canzelier sopra nominato e altri, dil castello di la Cephalonia, dicendo quel subassi non è per rendersi, in conclusion. *Item*, par eri vi andasse, oltra li cavalieri ysperi e Gorlin, *etiam* il capetanio yspero, e fo senza saputa di esso zeneral, che vi saria andato; et vette il sito dil castello, e fo con lui assa' persone di le sue e di le nostre. E poi, questa matina, mandò sier Hironimo Contarini, provedador, a la barza di ditto capetanio a scusar il zeneral non esser andato *etc.* Rispose voler tuor l'impresa, e far discargar le artillarie, e ponerle sotto il castello, e si potrà haverlo nel termine si preparerà i legnami per l'impresa di Modom, e perhò aspettava la resolution di esso zeneral; *unde*, consultato con ditto provedador Contarini, col capetanio di le galie grosse, capetanio di le nave e Gorlim, terminono risponderli de tuor l'impresa. E il provedador Pixani non vi era, et cussi ozi, da poi disnar, se reduseno insieme tutti, e unanimi deliberono opugnar ditto castello. *Item*, parte di le nostre galie sono andate mia 60, per taiar legnami; et doman trazerano 12 canoni di le barze su le carete, e li dà le zurme di 24 galie nostre, per condurli al castello; *etiam*, tra falconeti e altre artillarie, fino al numero di 40, et zorno e note si bombarderà, e buterano le mure zoso, et torano le difese, e si farà vituarie per il campo. *Item*, il patron di la nave dil capetanio di Franza voleva licentia *in scriptis*; et il capetanio li disse, faria fede dil suo esser stà in armada; et l'altra nave mai non à parso. *Item*, esso zeneral à ditto al capetanio yspero dil presente li manda la Signoria. Recusò acetarlo, dicendo si provedi di vin e vituarie per l'armata, e non vol altro; e à pagato li nollì a li patroni de li navilij di vini tolti. *Item*, a di 7, par sier Hironimo Pixani sia ritornato, e lauda di tuor l'impresa; e cussi quella matina il patron di la nave di Franza volse la fede, e cussi la fece. *Item*, se disgargava tuttavia in freta le artillarie di le barze ysperane. *Item*, per una poliza dice, la nave di sier Marco Orio, capetanio, è mal conditionada, e non po-